


A *rubá***A** *ntaño*

Den nos Aruba di Antaño un di diversión o pasa tempo popular y di lubida cualkier tension o problema tabata baimento di cine. Cine te cu e dia di awe ta un entretenimento popular. Pero hopi tal vez no sa con y unda esaki a cuminsa. Na principio e idea no tabata di e conocido fam De Veer, sino di Henriquez, kende despues a cambia tur esaki pa un pianola. Pero unda nan a hunga e prome pelicula, ta loke bo por mira riba nos grafico di awe. Bueno un parti di e muraya cu tabata ser usa como screen (pantalla) y ni geverf sino blancha. Esaki ta keda casualmente den un di e lugarnan cu diariamente nos ta bati riba cabez di e departamentonan di gobierno encarga cu e limpieza di nos dushi Aruba, pero cu nada ta ser haci. Nan wowo ta habri pero nan no ta mira, nan oido ta bon pero nan no kier scucha. E ta keda den e curá cual ta e cueba di e drogadictonan y e burachénan cu ta drumi den dje pa saca nan waya, y tambe pa otro cos nan censurable. Cine tabata e anochi di sali pa bai mira un pelicula, den tempo di antaño esaki tabata pelicula mudo, basta tempo prome cu cine parlante a bin na moda y hopi prome cu pelicula na color. Tambe den recuerdos di antaño nos por mustra y comenta di Teatro Gloria cu kima dos biaha. E prome biaha den oranan di anochi unda cu nos brandweer no tabata co'i gaba ya cu na momento cu mester a sali awa for di e slangnan loke a sali tabata djaka, pero Lago sin vacila a manda su fire-fighting (brandweer) pa yuda paga e candela grandi aki. Despues Teatro Gloria basta despues cu nos por a mira Carlos Gardel su actuacion di gaucho den dje, esaki a kima den oranan di dia. Nos amigo Cabenda su lugar e tempo ey, tal caminda nos ta mira Universal Sportshop y cu despues a bira y haya hopi otro ocupacion. Nos amigo Dongen di Dongen Sport Shop na SanNicolas tabata e operator. E prome biaha ta ora cu e pelicula a pega candela, anto Shon cu tabata den practica parece a habri e projector y e rol a corre afor pa causa e incendio enorme di e teatro Gloria. Band'i e teatro caminda nos tin Wimco awendia tabata e cantina di Shon Hensi y parti patras tabata biba Alfonso Mirep y su famia. Durante e incendio di prome biaha cual manera nos a menciona a tuma lugar den oranan di anochi, e No.1 su edificio cu ta keda net pabao di Wimco y cu ta cera pa basta tempo, tabatin un polaco cu su baratillo di paña y otro mercancianan. Pa salba su mercancia, el a pidi ayudo pa yudé saca su mercancia, y truck a bini y nan a carga tur loke por a ser poni den dje, pero te cu e dia di awe ningun hende sa unda e truck cu tur e mercancia a bai. Despues cu Teatro Gloria a kima pa di dos biaha a bini e Cine Aruba caminda Boekhandel Mariska ta awendia o mihor bisá pariba di Casa Azul di e tempo di antaño. Dushi ora bo por corda y trece na memoria di nos lectornan un tiki di e ARUBA ANTANO.